

# Ph.D-grad pillugu Namminersornerullutik Oqartussat nalunaarutaat

Ilisimatusarfik pillugu Inatsisartut inatsisaanni nr. 16, 31. oktobari 1996-imeersumi § 3, §§ 18- 19 aamma § 23, imm. 2 naapertorlugit aalajangersarneqarpoq:

**§ 1.** Ilisimatusarfik ilinniagassatut sammisami Avannaarsuani kulturikkut, oqaatsitigut aamma inuiaqatigiilerinermi pissutsit pillugit taamatullu aamma Ilisimatusarfiup nammineq ilisimatusarfigisami iluani ilisimatuutut ilinniagaqarnissamik neqerooruteqarsinnaavoq. Ilisimatuutut ilinniagaqarneq ilinniagartuunngorniarluni ukiuni pingasuni ilinniagaqarneruvoq, taannalu naammassigaanni Ph.D-grad (licentiatgraden) anguneqassaaq.

*Imm. 2.* Ilisimatusarfik nalunaarummi killissarititaasut iluanni maleruagassanik erseqqinnerusunik aalajangersaassaaq, isumagissallugulu maleruagassat taakku, tamatumanilu aamma Ph.D-mut ilinniagaqarnermi ilinniagassatut aaqqissuussat, soqutiginnittunit pissarsiarineqarsinnaanissaat.

**§ 2.** Ph.D-grad tunniunneqartarpoq pineqartumik pissarsitinneqartoq suliaqarfigisami iluani ilisimatuutut ilinniagaqarnerminik naammaginartumik naammassinissimatillugu, taamatullu ilisimatuutut allaaserisamik illersugassamik tamanut ammasumik illersuinermit uppersaasimasumut ilisimatusarnikkut suliniumminik namminersorluni suliaqarfiup iluani ilisimatuussutsikkut periutsit atorlugit naammassisaqarsinnaasimasumut, taamatullu ilisimatusarnerup pineqartup qaffasissusianik siuarsaataasinnaanermigut nunat tamalaat akornanni suliaqarfiup iluani Ph.D-gradinut allanut naapertuuttumik suliaqarsimasumut.

*Imm. 2.* Ph.D-inngorniarluni allaaserisaq illersugassaq naliliiffigissassatut tunniunneqarsinnaanngilaq taanna arlalinnit peqatigiilluni suliaappat.

*Imm. 3.* Ph.D-inngorniarluni allaaserisaq illersugassaq allaaserisat siusinnerusukkut tamanut saqqummersinneqartareersut tunngavigalugit PhD-nngorniarluni allaaserisatut illersugassatut tunniunneqarsinnaasoq Ilisimatusarfiup aalajangiiffigisinnaavaa. Allaaserisat tamanut saqqummersitat ilaat allanik suleqateqarluni suliaappata, allaaserinneqataasut tamarmik immikkut uppersassavaat Ph.D-inngorniarluni ilinniagaqartup suliaa qanoq annertutiginersoq.

*Imm. 4.* Ph.D-inngorniarluni allaaserisaq illersugassaq kalaallisut danskisut tuluttulluunniit allagaalluni tunniunneqassaaq. Allaaserisaq illersugassaq kalaallisut allagaalluni tunniunneqarpat ilutigalugu danskisut imaluunniit tuluttut allagaalluni aamma tunniunneqassaaq.

**§ 3.** Kikkut Ph.D-mut ilinniagaqartussatut allatsissanersut Ilisimatusarfiup aalajangertassavaa.

*Imm. 2.* Ilisimatusarfiup Ph.D-mut ilinniagaqartup ilinniakkaminik pitsaasumik ingerlatsisinaanissaminut atorfissaqartitassaata pissarsiarineqarsinnaasarnissaat qulakkiigassaraa, tak. § 4.

*Imm. 3.* Ph.D-mut ilinniagaqartut tamarmik Ilisimatusarfimmit toqqakkamit ilitsersuisoqartinneqassapput,

taassumalu ilinniagaqarnerup ingerlarnga tamaat ilitersuisutut pingaarnertut akisussaafiggissavaa, soorluttaaq taassuma saniatigut ilisimatusarfimmiit avataanniillu allamik allanilluunniit ilitersuisartussanik aamma toqqaasoqarsinnaasoq. Iltersuisartut professoriussapput imaluunniit tamakkiisumik atorfeqartitatut lektoriussallutik imaluunniit sammineqartumut atatillugu siuliani taaneqartutuulli piginnaasaqassallutik.

**§ 4.** Ph.D-mut ilinniagaqarneq ingerlanneqassaaq ukiut pingasut ilinniagaqarfusut sivisoqataattut, qaffasissutsimigullu kandidatitut taamatulluunniit qaffasitsigisumik ilinniagaqareersimaneq tunngavigissavaa.

*Imm. 2.* Pd.D-mut ilinniagaqartup ilinniagaqarnermi nalaani ilinniagassatut imminerminut aaqqissuussaasimasut naammassisaqarfigissavai. Ilinniagaqartup pikkorissartitsinerit qaammatit arfinillit missaannik sivilissuseqartartussat naammaginnartumik angusaqarfigisassavai. Ilinniagaqartup ilisimatusarfimmiinnaanngitsoq ilisimatusarfusunili allani, pingaartumik nunani allani, allatigulluunniit peqataasinnaa qulakkeerneqassaaq. Taamatuttaaq ilinniagaqartoq ilinniartitsisarnermik misillitagaqarsinnaalissaaq allatigulluunniit ilisimasanik ingerlatitseqqiisinnaasalissalluni, assersuutigalugu ingerlataqarfimmi imaluunniit suliffeqarfimmi ilisimatusarnermut atatillugu suliniummik ingerlatsiviusumi ilisimatuussutsikkut angusanik ingerlatitseqqiisarnikkut. Ilinniagaqartup nammineerluni ilisimatusarnermini suliaata naammaassineqarsinnaanissaannut aammalu ilisimatuutut allaaserisaanut illersugassaanut atatillugu ukiut pingasut pineqartut ingerlaneranni piffissaq atortariaqagaq periarfissartinneqassaaq. Ph.D-gradip tunniunneqarsinnaanera pillugu aalajangiineq ilisimatuutut allaaserisap illersugassap tunniunnerata kingorna piaarnerpaamik pissaaq.

**§ 5.** Ilisimatusarfiup Ph.D-nngorniarluni allaaserisap illersugassaq naliliiffigineqartussatut aamma akuersissutigisinnavaa saqqummiussaartoq Ph.D-mut ilinniagaqartutut allatsissimannikkaluarpalluunniit imaluunniit sivikitsuinnarmi taamatut ilinniagaqartuusimagaluarpalluunniit, tamatumani pineqartoq allatigut piginnaasaqalereersimappat §§ 2 aamma 4-mi tunngavigissassatut taasanut sanilliunneqarsinnaasunik.

**§ 6.** Ukiup affakkuutaarlugu nalilerneqartassaaq Ph.D-mut ilinniagaqartup ilisimatuutut ilinniagaqarnera naammaginnartumik ingerlanersoq. Taamaattoqanngippat ilinniagaqartumut - ataaseriaannarluni - neqerooruteqartoqassaaq qaammatit pingasut ingerlaneranni pissutsinik pineqartunik iluarsinissamut. Neqeroorut tamanna ilinniagaqartumit tigujumaneqanngippat taamatut ilinniagaqartutut allatsissimaneq qaammatip naanerani atorunnaarsinneqassaaq. Neqeroorulli ilinniagaqartumit akuerineqarpat qaammatit pingasut qaangiunnerisa kingorna qaammatip ataatsip iluani naliliisoqaqqissaaq. Naliliineq pitsaasuunngitsutut inerineqarpat allatsissimaneq atorunnaarsinneqassaaq. Taamaakkaluartorli Ph.D-mut ilinniagaqartup piumasarisinnaassavaa suliaasaq ilisimatusarfimmi Ph.D-gradinik tunniussisarnermik ingerlatsiviusumut saqqummiunneqassasoq, inaarutaasumik aalajangiiffigisassanngorlugu. Ilinniagaqarnermik naammaginnartumik ingerlatsisimaneq pillugu naliliisoqartillugu napparsimasianerit uppersaaserneqarsinnaasut imaluunniit naartunermi ernereernermilu sulinngiffeqarsimanerit mianerineqassapput.

*Imm. 2.* Ilinniagaqartup aalajangersakkat ilisimatusarfimmit aalajangersarneqarsimasut imaluunniit ilinniarnaq, ilisimatusaatinik suliaqarnerit allanillu ingerlataqarnerit ingerlatsivinni suliffeqarfiniluunniit allani naammassineqarniartillugit ilisimatusarfillu isumaqatigiissutaasimasut malinngippagit, tak. § 7, allatsissimaneq qaammatip naanissaanut atorunnaarsinneqarsinnaavoq, tamatumani ima annertutigisumik unioqqutitsisoqarsimappat assuarinninnissaq imaluunniit mianersoqqussuteqarnissaq

naammassangatinneqarnani. Taamatut aalajangiineq Ph.D-mut ilinniagaqartumit ilinniartitaanermut pisortaqarfimmut suliaassanngortinneqarsinnaavoq.

**§ 7.** Ilisimatusarfik ilisimatusarnermut ilinniartitaanertigut pikkorissarfiusinnaasut pilersinneqarnissaannik ingerlataqarfimmut il.il. allanut taakkuninngaluunniit peqateqarluni ingerlatsisarnissamik isumaqatigiissuteqarsinnaavoq, ilinniagaqartut peqataaffigisarsinnaasaannik, tamatumani ilaallutik aalajangersimasumik sammisaqarlutik ilisimatusarnermik ingerlataqarfiit imaluunniit suliffeqarfiit namminersortut, ilinniagaqartut ilisimatusarnerminnut atatillugu suliniutiminnik ingerlatsivigisinnaasaat.

**§ 8.** PhD-nngorniarluni allaaserisaq illersugassaq naammassereerpat taamatullu aamma ilitersuisumit pingaarnertut akisussaasumit ilinniagaqarneq naammaginartumik ingerlanneqarsimanersaq pillugu oqaaseqaat saqqummiunneqareerpat, tak. § 3, imm. 3, Universitetsråd, studienævnet inassuteqareernerisigut, ataatsimiititaliamik naliliisussaataasussamik pingasunillu ilaasortaqartussamik pilersitsissaaq, taakkulu professoriussapput imaluunniit tamakkiisumik atorfeqartitatut lektoriussallutik imaluunniit sammineqartumut atatillugu siuliani taaneqartutuulli piginnaasaqassallutik. Ataatsimiititaliami ilaasortat ikinnerpaamik marluk avataaneersuussapput. Ph.D-mut ilinniagaqartup ilitersuisua(-sui) ataatsimiititaliami ilaasortaasinnaatitaanngillat, taamaattorli ataatsimiititaliap sulinerani taaseqataasinnaatit peqataassallutik. Ph.D-mut ilinniagaqartoq ataatsimiititaliap qanoq katitigaanera pillugu ilisimatinneqassaaq periarfissinneqassallunilu sivikinnerpaamik ulluinnaat arfineq-pingasut ingerlaneranni akerliliisinaanissaminut.

*Imm. 2.* Ataatsimiititaliaq naliliisussaataasooq inassuteqaateqassaaq Ph.D-mut ilinniagaqartoq allaaserisami illersugassamigut, taamatullu tamanut ammasumik illersukkamini, § 2, imm. 1 naapertorlugu piumasaqaataasunik naammassinnissimanerminik uppersaasimanersaq. Ataatsimiititaliap naliliisussaataasup, illersuinissaq sioqqullugu, ilisimatuutut allaaserisami illersugassami allannguuteqartitsillunilu ilassuteqaateqartitsisoqarsinnaanissaa akuersissutigisinnaavaa.

**§ 9.** Tamanut ammasumik illersuinissaq qaqugukkut sumilu pissanersaq ilisimatusarfiup aalajangersassavaa, isumagissallugulu soqutiginnittut illersuinissaq sioqqullugu piffissaqarluarsinnaassasut allaaserisamik illersugassamik pissarsisinaanissaminut.

*Imm. 2.* Ph.D-mut ilinniagaqartoq suliani pillugu nassuiaasinneqassaaq tamatumalu kingorna ataatsimiititaliamit naliliisussaataasumit soraarummeersinneqassalluni. PhD-nngorniarluni allaaserisamik illersuisitsinermik aqutsisuusup illersuinerup nalaani allat saqqummiussaqaarsinnaanissannut akuersissuteqarsinnaavoq.

**§ 10.** Ataatsimiititaliaq naliliisussaataasooq illersuinerup naammassereernerata kingorna inassuteqaateqassaaq Ph.D-gradi tunniunneqartariaqarnersaq. Ataatsimiititaliaq tamarmiusoq tunniussisoqarnissaanik isumaqatigiilluni inassuteqaateqarsinnaanngippat, ataatsimiititaliap inassuteqaatigigallagaa PhD-mut ilinniagaqartumut nassiunneqassaaq, taannalu inassuteqaat pillugu oqaaseqaatigiumasaminik sapaatip akunneri marluk qaangiutsinnagit saqqummiussisinaaninneqassaaq. Tamanna pereerpat inaarutaasumik inassuteqaateqartoqassaaq.

*Imm. 2.* Ph.D-gradi tunniunneqassaaq ataatsimiititaliaq tamarmiusoq tamatumunnga isumaqatigiippat imaluunniit ilaasortat marluk tunniussisoqarnissaanik isumaqatigiippata, ilutigalugulu Universitetsrådimi taasinermi amerlanerussuteqartut inassuteqaataasooq malikkumappassuk.

**§ 11.** Pineqartumut Ph.D-gradimik pissarsitinneqartumut ilisimatusarfimmiit uppersaasat kalaallisut, danskisut aamma tuluttut allanneqarsimasooq tunniunneqassaaq. Uppersaasammi ilanngunneqassapput paasissutissat PhD-nngorniarluni allaaserisamut tunngassuteqartut. Ilisimatusarfiullu sukumiinerusumik

nammineq aalajangersagai malillugit ilinniagarineqarsimasooq pillugu paasissutissiisoqassaaq, tamatumunngalu ilanngullugit pikkorissarsimanerit, ingerlataqarfinni ilisimatusarfusartuni allaniittarsimanerit imaluunniit suliffeqarfimmiittarsimanerit il.il.

**§ 12.** Ilisimatusarfiup rektoria, pisuni ataasiakkaani immikkuullarilluinnartuni tunngavissaqartoqarpat, nalunaarummi aalajangersakkanik saneqqutsitsisinnaavoq, tamatumani Universitetsrådimit siunnersuuteqartoqareerneratigut.

**§ 13.** Matumani nalunaarut naapertorlugu aalajangiinerit pillugit naammagittaalliuteqarniaraanni, naammagittaalliullu § 6, imm. 2, § 12 imaluunniit apeqqutitut eqqartuussivilersuussassanut tunngassuteqarpat taanna ilinniartitaanermut Pisortaqarfimmut suliaassanngortinneqarsinnaavoq. *Imm. 2.* Naammagittaalliut ilisimatusarfimmut tunniunneqareersimassaaq aalajangiineq pineqartumut nalunaarutigineqareernerata kingorna kingusinnerpaamik sapaatip akunneri sisamat qaangiutsinnagit. Naammagittaalliut isumaqatigineqanngippat, naammagittaalliortullu naammagittaalliutini aalajangiusimaannarpagu, ilisimatusarfiup naammagittaalliut pisortaqarfimmut ingerlateqqissavaa.

**§ 14.** Nalunaarut atuutilerpoq ulloq 15. oktober 2001.

*Namminersornerullutik Oqartussat, ulloq 9. oktober 2001*

Lise Lennert

/

Karl Kristian Olsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

